

《優婆塞戒經》〈淨三歸品〉<sup>1</sup>

【科判】

甲一、善生問

甲二、如來答

乙一、明三歸依義

丙一、何因緣故受三歸依？

丙二、云何名爲三歸依也？

丙三、料簡

丁一、三歸即是一歸？

丁二、佛入僧數？

丁三、如來滅後歸佛是何歸？

乙二、明三歸次第

丙一、應先歸依佛

丙二、再歸依法

丙三、次歸依僧

乙三、明三歸依戒

丙一、禮拜等名供養三寶

丙二、歸三寶等名優婆塞

丙三、料簡

乙四、明三歸得失

丙一、三歸得失

丙二、料簡失不失

乙五、明破邪崇正

丙一、破邪

丙二、崇正

丁一、善業因緣故得自在安樂

丁二、善法欲因緣故得解脫果

丙三、料簡

丁一、在胎受歸能護

丁二、破外道解脫等義

丁三、結受三歸依是成佛根本

乙六、結在家修淨爲難

<sup>1</sup>養成信解，歸依三寶：《優婆塞戒經》〈淨三歸品〉

參考書目：太虛大師《優婆塞戒經講錄》淨三歸品第二十。

會性法師《優婆塞戒經節本講記》第六冊淨三歸品第二十。

## 甲一、善生問

善生言：「世尊！如佛先說：有來乞者，當先教令受三歸依，然後施者。何因緣故受三歸依？云何名爲三歸依也？」

## 甲二、如來答

### 乙一、明三歸依義

#### 丙一、何因緣故受三歸依？

善男子！爲破諸苦，斷除煩惱，受於無上寂滅之樂，以是因緣受三歸依。

#### 丙二、云何名爲三歸依也？

如汝所問云何三歸依者？善男子！謂佛法僧。佛者，能說壞煩惱因，得正解脫。法者，即是壞煩惱因，真實解脫。僧者，稟受破煩惱因，得正解脫。

### 丙三、料簡

#### 丁一、三歸即是一歸？

或有說言：若如是者，即是一歸。是義不然！何以故？如來出世及不出世，正法常有，無分別者。如來出已，則有分別，是故應當別歸依佛。如來出世及不出世，正法常有，無有受者，佛弟子衆能稟受故，是故應當別歸依僧。正道解脫，是名爲法；無師獨覺，是名爲佛；能如法受，是名爲僧。若無三歸，云何說有四不壞信？得三歸者，或有具足，或不具足。云何具足？所謂歸佛、法、僧。不具足者，所謂如來歸依於法。善男子！得三歸者，無不具足，如比丘、比丘尼、優婆塞、優婆夷戒。善男子！如佛、緣覺、聲聞各異，是故三寶不得不異。云何爲異？發心時異，莊嚴時異，得道時異，性分各異，是故爲異。何因緣故說佛即法？能解是法，故名爲佛；受分別說，故名爲僧。

#### 丁二、佛入僧數？

若有說言：佛入僧數。是義不然！何以故？佛若入僧，則無三寶及三歸依、四不壞信。善男子！菩薩、法異，佛、法亦異。菩薩二種：一者、後身，二者、修道。歸依後身，名歸依法，歸依修道，名歸依僧。觀有爲法多諸罪過，獨處修行，得甘露味，故名爲佛；一切無漏無爲法界，故名爲法；受持禁戒，讀誦解說十二部經，故名爲僧。

#### 丁三、如來滅後歸佛是何歸？

若有問言：如來滅已，歸依佛者是何歸依？善男子！如是歸依，名爲歸依過去諸佛無學之法。如我先教提謂長者：「汝當歸依未來世僧。」依過去佛，亦復如是。福田果報，有多少故，差別爲三。若佛在世及涅槃後，供養果報，無有差別；受歸依者，亦復如是。如佛在世，爲諸弟子立諸要制；佛雖過去，有犯之者亦獲罪報。歸過去佛，亦復如是。猶如如來臨涅槃時，一切人天爲涅槃故，多設供養，爾時如來未入涅槃，猶故在世，懸受未來世供養事；歸過去佛，亦復如是。譬如有人父母在遠，是人或時瞋罵得罪，或時恭敬讚歎得福；

歸過去佛，亦復如是。是故我說：我若在世及涅槃後所設供養，施者受福等無差別。

## 乙二、明三歸次第

### 丙一、應先歸依佛

善男子！若男、若女，若能三說三歸依者，名優婆塞、名優婆夷。一切諸佛雖歸依法，法由佛說故得顯現，是故先應歸依於佛。淨身口意，至心念佛，念已即離怖畏苦惱，是故應當先歸依佛。智者深觀如來智慧解脫最勝，能說解脫及解脫因，能說無上寂靜之處，能竭生死苦惱大海，威儀庠序三業寂靜，是故應當先歸依佛。

### 丙二、再歸依法

智者深觀生死之法，是大苦聚，無上正道能永斷之；生死之法，渴愛飢饉，無上甘露味能充足，生死之法，怖畏嶮難，無上正法能除斷之；生死錯謬，邪僻不正，無常見常，無我見我，無樂見樂，不淨見淨，無上正法悉能斷除；以是因緣，應歸依法。

### 丙三、次歸依僧

智者應觀外道徒衆，無慚無愧，非如法住，雖爲道行，不知正路，雖求解脫，不得正要；雖得世俗微善之法，慳吝護惜，不能轉說，非善行性，作善行想。佛僧寂靜，心多憐愍，少欲知足，如法而住，修於正道，得正解脫，得已復能轉爲人說，是故應當次歸依僧。

## 乙三、明三歸依戒

### 丙一、禮拜等名供養三寶

若能禮拜如是三寶，來迎去送，尊重讚歎，如法而住，信之不疑，是則名爲供養三寶。

### 丙二、歸三寶等名優婆塞

若有人能歸三寶已，雖不受戒，斷一切惡，修一切善，雖復在家，如法而住，是亦得名爲優婆塞。

### 丙三、料簡

若有說言：先不歸依佛法僧寶，當知是人不得戒者。是義不然！何以故？如我先說：善來比丘！是竟未得歸依三寶，而其戒律悉得具足。或有說言：若不具受，則不得戒；八戒齋法，亦復如是。是義不然！何以故？若不具受不得戒者，求有優婆塞云何得戒？實是得戒，但不具足。八戒齋法若不具受，雖不名齋，可得名善。善男子！若能淨潔身、口、意業受優婆塞戒，是名五陰。云何五陰？不受邪見，不說邪見，信受正見，說於正見，修行正法，是名五陰。

## 乙四、明三歸得失

### 丙一、三歸得失

受三歸已，造作癡業，受外道法，自在天語，以是因緣失於三歸。若人質直，心無慳貪，常修慚愧，少欲知足，是人不久得寂靜身。若有造作種種雜業，爲受樂故修於善事，如市易法，其心不能憐愍衆生，如是之人，不得三歸。

### 丙二、料簡失不失

若人爲護舍宅身命，祠祀諸神，是人不名失歸依法；若人至心信其能救一切怖畏，禮拜外道，是人則失三歸依法。若聞諸天有曾見佛功德勝己，禮拜供養，是不失歸依之法。或時禮拜自在天王，應如禮拜世間諸王、長者、貴人、耆舊有德，如是之人，亦復不失歸依之法。雖復禮拜，所說邪法慎無受之。供養天時，當起慈心，爲護身命、財物、國土、人民恐怖。

## 乙五、明破邪崇正

### 丙一、破邪（應觀外道所說爲邪）

所說邪見，何故不受？智者應觀外道所說：云一切物，悉是自在天之所作。若是自在之所作者，我今何故修是善業？或說：投淵、赴火、自餓捨命，即得離苦。此即苦因，云何說言得遠離苦？一切衆生作善惡業，以是業緣自受果報。復有說言：一切萬物，時節、星宿、自在天作。如是邪說，我云何受現在造業，亦受過去所作業果？智者了了，知是業果；云何說言時節、星宿、自在作耶？若以時節、星宿因緣受苦樂者，天下多有同時、同宿，云何復有一人受苦，一人受樂，一人是男，一人是女？天、阿修羅有同時生，同宿生者，或有天勝阿修羅負，阿修羅勝諸天不如；復有諸王同時、同宿俱共治政，一人失國，一則保土。諸外道等亦復說言：若有惡年、惡宿現時，當教衆生令修善法以攘卻之。若是年、宿，何得修善而得除滅？以是因緣，智者云何受於外道邪錯之說？

### 丙二、崇正

#### 丁一、善業因緣故得自在安樂

善男子！一切衆生，隨於業行，若修正見，受於安樂，修邪見者，受大苦惱。因修善業，得大自在，得自在已，衆生親近。復爲宣說善業因緣，善業因緣故得自在，一切衆生皆由修善業因緣故得受安樂，非年、宿也。善男子！阿闍世王、提婆達多，皆由造惡業因緣故墮於地獄，非因年、宿得是報也！鬱頭藍弗邪見因緣，未來當墮大地獄中。

#### 丁二、善法欲因緣故得解脫果

善男子！一切善法，欲爲根本，是欲因緣，得三菩提及解脫果。入出家法，破本惡業及諸有業，能受持戒，親近諸佛，能一切捨施於乞者，能作定性壞惡果報，滅大惡罪，得決定聚，離於三障，善能修集壞煩惱道。是欲因緣，

能受三歸，因三歸已即能受戒，既受戒已，行見、修道過於聲聞。若有畏於師子、虎、狼、惡獸等類，歸依於佛，尙得解脫，況發善心求出世者不得解脫？

### 丙三、料簡

#### 丁一、在胎受歸能護

阿那邠坻教告家內在胎之子，悉受歸依，是胎中子實不成就。何以故？是法要當口自宣說；雖不成就，亦能護之。

#### 丁二、破外道解脫等義

善男子！諸外道說：一切世間皆是自在天之所作；亦復說言：未來之世過百劫已，當有幻出，所言幻者，即是佛也。若自在天能作佛者，是佛云何能破歸依自在天儀？若自在天不能作佛，云何說言一切皆是自在天作？外道復說：大梵天王、大自在天、毘紐天主，悉皆是一，復說生處各各別異。自在天者，名自在天，名常，名主，名有，名曰律陀，名曰尸婆，是一一名，各有異事，亦求解脫亦即解脫。是義不然！何以故？若自在天能生衆生，造作諸有，作善惡業及業果報，作貪、瞋、癡繫縛衆生。復言衆生得解脫時，悉入身中，是故解脫是無常法。是義不然！何以故？若無常者，云何得名爲解脫也？如婆羅門子還得壽命，是故不得名自在天。是三種天亦不得一。何以故？阿周那人毘紐大天爲作解脫，以是義故亦不得一。若言解脫是無常者，當知即幻，非佛名幻。若能了了正見真我，是名解脫。復有說言：見微塵者，是名解脫。復有說言：見性異我異，是名解脫。是義不然！何以故？若能修道見四真諦，是人乃得見性見我。

#### 丁三、結受三歸依是成佛根本

若人能受三歸依者，是人乃能真見四諦。是三歸依，乃是一切無量善法，乃至阿耨多羅三藐三菩提之根本也。

### 乙六、結在家修淨爲難

菩薩二種：一者、在家，二者、出家。出家菩薩淨三歸依，是不爲難；在家修淨，是乃爲難。何以故？在家之人多惡因緣所纏繞故。